

3
SANTISSIMI DOMINI NOSTRI
BENEDICTI

P A P Æ X I V.

INSTRUCTIO PASTORALIS
SUPER NONNULLIS DUDIIS
C I R C A

COPHTORUM RITUM

Ad JUSTUM MARACHI in Univerſa
Ægypto Vicarium Generalem ,

*Et P. JACOBUM A CREMISIR Ordinis
S. Franciſci Strictioris Obſervantiæ
Præſectum Miſſionis Apoſtolicæ
in Ægypto, cæteroſque Miſ-
ſionis Cophtæ Miſſionarios.*



ROMÆ, MDCCL.

Typis Sac. Congr. de Propaganda Fide.



BENEDICTUS

PAPA XIV.

Dilecti Filii salutem, & Apostolicam Benedictionem. Ex 4
Bu
ton



O quamvis tempore, quo pro demando Nobis Apostolicæ servitutis onere tot tantisque curis circumdamur, ut penè obruamur, delata

ad Nos fuerint nonnulla Postulata a Religioso Viro Jacobo a Cremisr Ordinis Fratrum Minorum S. Francisci Strictioris Observantiæ, & Missionum Apostolicarum in Ægypto Præfecto; Nihilominus in eo, qui infirmitatem Nostram misericorditer regit, confidentes, operam studiumque nostrum ad proposita enodanda

dubia libenter adjecimus in spirituale electi illius Gregis solatium, qui magno licet intercedente Terrarum spatio a Nobis dissitus sit, Paterno tamen Cordi Nostro charitate proximus efficitur. Quas sanè Pontificiæ sollicitudinis, & providentiæ partes æcum a nemine desiderari patiamur, qui verum Deum per veram fidem agnoscat; peculiari sibi illas vindicat jure Inclyta Cophtorum Natio, quæ præcipui cultus, ac Filialis obsequii, quo Romanam Ecclesiam omnium aliarum Matrem, & Magistram profèquitur, non semel luculenta, & perenni digna laude præbuit specimina; Præsertim verò in Sacra Oecumenica Florentina Synodo, in qua fel: rec: Eugenio Papa IV. Prædecessore Nostro expetitam diù Græcæ Latinæque Ecclesiæ Unionem promovente, veteri ejusdem Unionis incendi desiderio visa est, palamque edocuit, oportere membra sub uno in Terris Capite indivisa consistere. In ipsum quoque testata est Successoribus Romanis Pontificibus Pio IV., & Gre-

& Gregorio XIII. omni conatu in præmissæ Unionis scopum enitenti-
bus; Ac apertiùs etiam Clemen. VIII.,
ad quem solemni, & honorifica de-
creta Legatione, obsequentis animi,
ac devotæ in Romanam Ecclesiam
voluntatis publica exhibuit Testi-
monia.

Hanc quoque egregiam propen-
sionem adhærendi Romanæ Ecclesiæ
planè perspectam habuit alter Noster
Prædecessor Urbanus Papa VIII., qui
zelo, & sedulitate pari in id potissi-
mum incubuit, ut prædicta Ecclesia-
rum Unio indissolubili charitatis fœ-
dere pro virili parte firmaretur. Ala-
criores tamen præ omnium rationum
momentis ad hanc exequendam Pa-
storalis Officii partem Nos effecit
jampridem concepta, intimeque Cor-
di Nostro infixæ spes majoris incre-
menti Catholicæ Religionis, & lucri
Animarum, quibus erudiendis in Su-
periori, ac Inferiori Ægypto, & in
Urbe Principe Cairo strenuam, in-
victamque navant operam Apostolici
Missionarii ex Franciscana ut pluri-

num Familia adlecti, qui nullo laborum aspectu territi, sed induti fortitudine ex Alto, in summa rerum, ac temporum difficultate Nationem illam toto olim Orbe Terrarum celeberrimam, nunc verò assiduis ærumnis attritam, ac penè confectam, verbo vitæ informant, vigilesque laborant, ut novi in diem palmites in Vineam Domini traducantur.

Adhibitis itaque in consilium nonnullis Venerabilibus Fratribus S. R. E. Cardinalibus, Dilectisque Filiis Consultoribus in Congregatione Supremæ, & Universalis Inquisitionis contra hæreticam pravitatem confidentibus, exquisitisque, quò maturius deliberare possemus, aliorum etiam doctrinâ & prudentiâ præstantium Virorum suffragiis, eorumque præsertim, quibus Orientalium mores, Ritus, & Instituta longo usu & experientia essent cognita, planeque perspecta, privati Nostri laboris accessione, singulorum sententias scripto traditas expendimus, atque libravimus. Cum tamen ad
fin-

singula definienda dubia in præsentialium quamplurima desiderantur; idcirco hæc Apostolica scripta Missionariis exhibenda mandavimus, ut ea, quæ definitivo reliquorum dubiorum judicio facem quodammodo præferre valent, ad Nostri Apostolatus auditum quamprimum deducenda curret.

DUB. I. *Cum Fideles Cophti Catholicam profitentes Religionem a Baptismo Ritu Ecclesiæ Latine collato hoc porissimum nomine abhorreant, quod Baptizatis una simul non conferatur Sacramentum Confirmationis: Quæritur, an in casu, quo Sacerdos Ritus Cophti commodè adiri nequeat, permittendum sit PP. Missionariis illico post Baptismum Confirmationem conferre?*

DUB. II. *An Parochis Ritus Cophti, qui a Schismate redeunt ad Catholicæ Ecclesiæ Unitatem, tribuenda sit facultas administrandi Catholicis Sacramenta*

Parochialia, quæ prius potiebantur inter Schismaticos; quamvis eadem administratio, nullo existente Parocho Catholico, demandata sit Patribus Missionariis?

DUB. III. *An Cophtis proprio Ritu in ætate puerili ad Diaconatus Ordinem promotis, ubi legitima ad contrahendum Matrimonium ætas advenerit, liceat nedom primum, sed alterum quoque inire Matrimonium vi dispensationis obtentæ a Patribus Missionariis absque ullo speciali Indulto Apostolico?*

DUB. IV. *An dicti Diaconi Officium Divinum recitare teneantur?*

Quod attinet ad *primum*, planè compertum Nobis est, veteri more, & discip'ina invaluisse apud Cophtos, ut abluti Sacro Regenerationis Lavacro illico ab eodem Sacerdote post absolutas Baptismatis Cœremonias Sacro Chrismate liniantur, ut præ aliis testatur Thomas a Jesu in suo *Tractatu de Conversione Gentium lib. 7.*

lib. 7. cap. 7. De simultanea tamen utriusque Sacramenti administratione non una eademque fuit agendi ratio cum Græcis apud Orientales Ecclesias residentibus, & illis, qui comorantur in Italia, & Insulis eidem adjacentibus. Quemadmodum enim Græcis Incolis Italiæ expresse vetita est administratio utriusque Sacramenti ab eodem Ministro contemporanee facienda; Ita patientia quadam, & facilitate Sedis Apostolicæ factum est, ut unum, & alterum Sacramentum ab eodem Sacerdote in Oriente Græcis conferretur; Nec defuere idcirco Theologi, qui hujusmodi tolerantia vestem, & imaginem tacitæ Dispensationis obducerent.

Quo opportune præmisso, apte distinguenda sunt, diversoque jure censenda duo, quæ exinde profluunt, extrema: Aliud enim est, quod Cophiti ex Indulgentia Apostolicæ Sedis licitam sibi adstruant collationem utriusque Sacramenti servato Orientalis Ecclesiæ Ritu, ab eadem Apostolica Sede non expresse vetito,

sed tolerato : Longe verò diversum , quod tolerantiam in peiorem partem detorquentes abhorreant a Baptismo Ritu Latino collato , hoc potissimum nomine , quod seorsim a Confirmatione administretur . Idcirco sicuti lenitati , & patientiæ Sedis Apostolicæ consonum videri potest , quod Cophti in suo jamdiù recepto , & ab eadem Sede tolerato usu perseverent ; Ita ferendum non est , quod Baptismum Ritu Latino , & seorsim a Confirmatione collatum acerbo , alienoque animo perhorrescant .

Præterea licet apud Occidentales etiam Ecclesias in more posita quandoque fuerit Baptismatis , & Confirmationis simultanea collatio , & hæc consuetudo in aliquibus Diocesibus anteacto tempore inoleverit , juxta exempla relata a *Vicecomite in Tract. de Confirmat. cap. 14.* , & a *Martene de antiqu. Eccles. Rit. lib. 1. cap. 2. art. 1.* : Nihilominus abrogato prorsus a Romana Ecclesia aliarum Matre , & Magistra hujusmodi more, consultissimis Summorum Pontifi-

tificum Decretis provide cautum est, ut renatis Fonte Baptismatis conferretur Sacramentum Confirmationis in ea solum ætate, in qua Fideles, evacuatis, quæ erant parvuli, intelligerent, tantum inter se differre Baptismum & Confirmationem, quantum in naturali vita distat generatio ab incremento; seque per Baptismum fuisse quidem ad militiam receptos, per Confirmationem verò ad pugnam roboratos; & ad perferendos agones per Gratiam instructos. Ex quo fit, ut rigidè animadverti in eos oporteat, si qui forte sanctioris hujusce disciplinæ instituta refugerent, aut contemnerent; omnemque curam adhibendam esse, ut ab errore, & cæcitate, Ecclesiæ Latinæ adeo injuriosa, retrahantur.

Verùm attributa, juxta propositum thema, Sacerdotibus Latinis facultate conferendi statim post Baptismum, Confirmationem, tantum abest, ut Orientales captivari possint in obsequium veritatis, ut immò animo semper obfirmatiore suæ adhære-

rent sententiæ, erga quam facilè se, ac pronam Apostolica Sedes exhiberet. Præterea Hæretici, & Schismatici, qui improbo, pravoque ut plurimum ingenio Catholicorum facta interpretantur, vel inconstantiae notam inurerent Latinis a suscepta semel, probataque disciplina deflectentibus; vel suo exemplo eos commovisse, & in suas traxisse partes superbe dictitarent, ipsa temere vertentes officia pietatis in elationis argumentum.

Si itaque ea sit Nationis Cophthæ conditio, ut Fideli Populo Confirmatio administrari nequeat ab Episcopis, quibus hujus Sacramenti administrandi ordinaria potestas commissa est; minime Nos latet, eandem administrandæ Confirmationis potestatem ex Indulto Apostolico ad Sacerdotem, vel Missionarium pro modo necessitatis quandoque deferri posse. Hujusmodi delegatio non nova, nec inusitata videri debet; cum S. Gregorii Magni, aliorumque Romanorum Pontificum Nostrorum Pre-

de-

decessorum sanctissimis innitatur exemplis. Cum enim sæpe contigerit, Christifideles, Pastoris solatio esse destitutos, & Episcopis ob distantiam locorum impossibile, vel difficile admodum fuerit Populorum necessitatibus præsentem fieri; in hanc partem Episcopalis Ministerii vocati sunt Sacerdotes, dummodo uterentur Chrismate ab Episcopo ritè benedicto, & consecrato: Ne alias contingeret, Fideles rem sanctitatis plenam cunctando negligere, vel decedere sine hoc Sacramento divinis muneribus cumulado, & ad nostram sanctificationem instituto.

Apostolici igitur Missionarii; non suæ authoritatis incremento, sed lucro tantum Animarum inhiantes; qua par est sedulitate, & diligentia inquirant, an Catholico GREGI, super quo vigilias custodiunt, desit præsentia Pastoris; an difficilis, vel impossibilis sit frequens illius accessus; an fidelis Populus in casu necessitatis versetur; & an demum circumstantiæ in unum collectæ præmissis con-

consonent exemplis, ac parem exposcant providentiam. Integra porro, sinceraque fide ea omnia quamprimum renunciunt Sanctæ Sedi, ut re tota sedulo cognita, intimeque perspecta, deliberare possit, an, & cui potissimum Presbytero, tamquam Ministro extraordinario, tribuenda sit hæc autoritas confirmandi, & Episcopale hoc munus obeundi.

Ipsi interim Missionarii, quibus datum est exhortari in doctrina sana, & eos, qui contradicunt, arguere, satagant, ut fidelis Populus ab errore ad veritatem, ab odio ad obsequium erga Baptismum Ecclesiæ Latinæ reducatur, utque Gens illa tandem agnoscat, pia sanctaque ordinatione fuisse dispositum, ut seorsim a Baptismate conferretur Sacramentum Confirmationis iis, qui in provectiori essent ætate, & ad percipiendam virtutem Sacramenti accommodata.

Hæc quoad primum Dubium. Quo verò ad secundum, licet in sui primordio Catholica Ecclesia hæresim

fim ejurantibus non semel ostenderit
 dura, ut eos potaret vino compun-
 ctionis; ideoque promotos ad Sa-
 cros Ordines solius Laicæ Commu-
 nionis participes voluerit; ab hac
 tamen severitate judicii successivis
 temporibus temperatum est, & ipsi
 Nicenæ Synodi Patres *Canone* 8. ul-
 tro consensere, quod Novatiani in
 Sacris Ordinibus constituti, ab er-
 rore in semitam veritatis reduces,
 nedum permanerent in Ordine Cle-
 ricali, sed etiam obtentarum Digni-
 tatum honore (providis tamen ad-
 jectis legibus) fruerentur. Hanc
 quoque piæ Matris Ecclesiæ lenita-
 tem in amplexum Filiorum occur-
 rentis, experti sunt Donatistæ. Si-
 quidem Catholici Præsules, qui ge-
 mino adstipulante Edicto Marcellini
 Proconsulis eos pro agenda Religio-
 nis causa advocaverant in illum Con-
 ventum Ecclesiasticis monumentis
 tantopere celebratum, quo facilius
 ad veræ Fidei cultum, & unitatem
 allicerent, retentionem gradus Epi-
 scopalis antea adepti, veluti quod-
 dam

dam conciliandæ pacis præliminare, illis consulto obtulere.

Præclara hæc lenitatis argumenta attento Nobiscum animo repetentes, æquum visum est, ut Parochi Ritus Cophti, valide tamen ac rite ordinati, qui ex atra errorum, in quibus versabantur, caligine, in lucem Catholicæ veritatis emergunt, capaces sint etiam inter Catholicos Administrationis Sacramentorum Parochialium, quâ prius in Schismate potiebantur, quamvis hæc ipsa spiritualis autoritas, nullo existente Parocho Catholico, tributa etiam sit PP. Missionariis, & ab illis exerceatur. Hanc autem capacitatem, quæ singulis inest, ita temperandam esse decernimus, ut non omnes indistincte hoc Pastorale munus sibi assumant, sed ii tantum, quos Vicarius Generalis Dominico Gregi præfecerit; qui pietate, castis moribus conspicui sint; qui bonorum exemplo præluceant; & in quorum reditu ad Ecclesiam nihil fictum, aut simulatum, sed certum sinceræ Con-

ver-

versionis indicium deprehendatur. Præterea qui a Vicario Generali inter alios præelecti fuerint, abstineant ab exercitio dictæ Authoritatis, quo- usque non reportaverint necessariam in utroque foro absolutionem, reha- bilitationem, nec non dispensatio- nem ab Irregularitate, Censuris, & pœnis, lapsis in Hæresim canonicè inflictis. Ritu præterea Catholico administrent Sacramenta. Nullum eisdem cum Schismaticis in Divinis sit consortium, ex quo hæresis, pra- væque mentis suspicio suboriatur: Sed interjecto cum Schismaticis pa- riete, corde puro, conscientia bona, fide non ficta, præcepta Matris Ec- clesiæ, quæ denuo eos in Christo ge- nuit, intemerate custodiant.

Ex hac porro indulgentia ube- rem in dies spiritualium gaudiorum messem expectamus, lucrum scilicet Animarum ad gremium Ecclesiæ re- deuntium: Probè enim intelligent, Nos Pastoris Jesu Christi vicem in Terris tenentes, tantùm quærere, & saluum velle, quod perierat; Oves- que

que inventas non virgâ timoris , sed officio charitatis ad Ovile congregare .

Nec conqueri jure poterunt Missionarii suam authoritatem hoc pacto videri imminutam , si oportune in memoriam revocaverint, quæ ab eorum Patre , & Institute S. Francisco in suo Testamento scripta leguntur : *Et si haberem tantam sapientiam , quantam Salomon habuit , & invenirem pauperculos Sacerdotes in Parochiis , in quibus morantur , nolo contra eorum voluntatem prædicare .* Cui sententiæ consona sunt documenta S. Bonaventuræ in suo Tractatu : *Quare Fratres Minores prædicent : Temperatissimè ,* inquit Sanctus Doctor , *disposuit divina Sapientia , & instituit Sedes Apostolica , ut per Ordines prænotatos in prædicatione , & confessione defectus Cleri suppleatur , & Anima salventur , & nec in spiritualibus , nec in temporalibus Jus Clericorum aliquatenus minuat .* Parique censurâ in simili negotio , cum Græcis Melchitis nuperrimè
di-

discussio, a Nobis definitum est: *Licere tantum Fratribus Ordinis Minorum Sancti Fræisici Custodiæ Terræ Sanctæ Parochialia munia obire circa Græcos Melchitas, eisque Sacramenta administrare in iis locorum, & temporum circumstantiis, quibus omnino deficiat modus habendi Parochum, aut alium Antistitem Græci Ritus.*

Neque etiam perperam timeant Missionarii sibi in Vineâ Domini tanquam Operariis tota die otiosis, & a bono opere torpentibus nullam, & exiguam occasionem impendendi laboris esse relictam. Prædicandum est ab illis sanctum Christi Evangelium, & docenda Mysteria Christiano Homini necessaria ad æternam salutem; explicanda vitia, quæ declinare, virtutes, quas sequi oporteat; adhibenda medela fauciatis per Sacramentum Pœnitentiæ; Tum alia quoque administranda sunt Sacramenta in subsidium Presbyterorum Ritus Cophti; nihil demum derelinquendum est, quod ad Animarum salutem, & Religionis incrementum pertinere pos-

possit . Potissima tamen sollicitudo conferenda est, ut Sacerdotes Cophti a Fidei unitate , rectâque semitâ declinantes , erroris depulsa caligine ad unionem , & amplexum Catholice Ecclesiæ revocentur , eorumque numerus augeatur ; hoc enim pacto Vineâ Domini Sabaoth reflorescet , optatumque fructum salutis , benedicente Domino , dabit in tempore suo .

Ad tertium , & quartum Dubium gradientes , pro faciliiori & accuratiori illorum examine juvat præmittere , verificari practicè , & in concreto apud Cophtos, quod in abstracto , & pro suo ingenio disputant inter se Latini Theologi , & Canonistæ de Ordine sacro Infanti ante rationis usum , vel ante pubertatem collato . Præmaturam hujusmodi Ordinationem apud Cophtos veteri usu , & disciplina invaluisse testatur P. Thomas a Jesu dicto Oper. de Convers. Gent. lib. 7. pag. 361. : *Conferuntur*, inquit, *Ordines , excepto Presbyteratu , omni ætati , etiam im-*
me-

mediate post Baptismum Parvulis, simulque dantur Tonsura, & quatuor Gradus, & Diaconatus, & Subdiaconatus; nec hisce conferendis interstitia, vel tempora particularia determinata sunt. Ubi Sacros Ordines recipiunt, castitatem, & abstinentiam pollicentur, jejunare videlicet diebus Mercurii, & Veneris, & tempore Adventus, & Quadragesimæ &c. Insuper etiam Quadragesimis Apostolorum Petri & Pauli, & Assumptionis. Quando autem Infantulis, aut Pueris Sacri Ordines conferuntur, pro eis spondent, & hæc vota observant ipsorum Parentes, donec decimum sextum ætatis Annum, aut circiter exegerint.

Hanc quoque vigentem inter Cophtos consuetudinem assumendi ad Ordinem Diaconatus constitutos in ætate infanti, confirmat suo testimonio Carolus Franciscus a Breno in *Manuali Mission. Oriental. tom. 1. lib. 3. cap. 2. num. 5.*; idemque usus evincitur ex litteris P. Beruat. Missionarii Societatis Jesu datis Anno 1706.

Cai-

Cairo ad P. Solerium magni nominis, probatæque doctrinæ Bollandistam; memoratis in iisdem litteris *Cophorum*, seu *Jacobitarum* moribus, & institutis, advertit, Diaconos promotos in ætate sex, vel septem Annorum in immensum excrevisse numerum, cæteroquin necessarium, ne Ecclesia debitis fraudetur obsequiis; neve Divina Mysteria absque decenti Ministrorum cultu, & frequentia celebrentur; quemadmodum videre est *in continuatione Bollandi tom. 5. Mens. Jun. pag. 132.*

Nemo adeo rudis est, qui ignoret in Ecclesia Occidentali diversos Ordines, & Ministrorum Gradus fuisse institutos, & in sua ritè tempora dispositos. Primâ etenim Tonfurâ initiandi sunt præditi usu rationis, qui in septimo ætatis Anno præsumitur. Minoribus verò Ordinibus licet determinata ætas a Sacris Canonibus præstituta non sit, adhuc a septimo ad decimum quartum Annum conferri solent, concurrentibus tamen in Ordinando qualitatibus de-

fide-

fideratis a Tridentino *sess. 23. de Reformat. cap. 5. & 11.* Porro ejusdem Tridentinæ Synodi lege cautum est, ad Subdiaconatum ætatem vigesimi secundi Anni, ad Diaconatum vigesimi tertii, ad Presbyteratum vigesimi quinti, ad Episcopatum trigesimi esse necessariam; eo tantum inter Sacros Ordines & Episcopatum recurrente discrimine, quod pro Sacris Ordinibus satis sit unius, vel alterius respectivè Anni inchoatio, pro Episcopatu verò complementum trigesimi Anni requiratur. Si tamen in hujusmodi providè institutarum Legum contemptum contingeret fortasse ab Episcopo legitima authoritate sufful-
to non solum Minores, sed etiam Sacros Ordines Infanti conferri; concordì Theologorum, & Canonistarum suffragio definitum est, *validam*, sed *illicitam* censi hanc Ordinationem, dummodò nullo laboret substantiali defectu materiæ, formæ, & intentionis in Episcopo Ordinante; non attentâ contrariâ sententiâ, quæ raros habet asseclas, & quæ su-
pre-

premis Tribunalibus , & Congregationibus Urbis numquam arrisit .

Æquè tamen certum , & exploratum est , per hanc Ordinum collationem non subjici Promotos obligationi servandæ Castitatis , nec aliis oneribus ab Ecclesia impositis ; cum electio statûs a libera cujusque pendeat voluntate , & Altissimo nostra , non autem aliena vota reddere teneamur . Obsolevit enim vetus illa Ecclesiæ Disciplina , quæ coactè , aut per vim Promotos ad Sacerdotium , & Episcopatum duro subiciebat jugo servitutis , & observationis onerum , & legum cuicumque Ordini impositarum , spretâ quavis protestatione Ordinati , vel Promoti contra vim illatam , spretâque declaratione animi a suscepto Ordine abhorrentis . Insuper licèt usque ad sæculum duodecimum consueverint Parentes Filios in infanti ætate positos in sacris Monachorum Cœnobiis devovere , & Divino Famulatu mancipare , perpetuò vetito egressu è septis Monachorum : attamen mitioribus Clemen-

mentis III., Cælestini III., & Tridentinæ Synodi decretis abrogata fuit Lex illa, contra quam naturæ, & liberi arbitrii jura clamare videbantur.

Non defunt tamen graves Theologi, qui accuratiori etiam examine rem intimè scrutentur: Ajunt siquidem, Infantes promotos ad Sacros Ordines, ubi sui compotes jam fuerint, disertè esse interrogandos super intentione permanendi, nec ne, in Ordine sibi collato. Si firmo deliberatoque animo palam assenserint; eo casu censent eos obstringi voto Castitatis: sin minus, licitum sit eisdem ad sæcularia vota transire, suspensâ exercendi Ordinis potestate.

Alium expendunt casum Theologi, Ordinis suscepti post usum rationis, sed ante pubertatem. Affirmant, ita Ordinatum tunc solùm obligari voto servandæ Castitatis, quando Ordinationem *expresse* ratam habuerit, vel *facite* aliquo exteriori signo, puta quia ministraverit in Ordine suscepto, vel quia pensum

diurnum horarum Canonicarum more aliorum absolverit: Quousque rati habitio non superveniat, iidem Theologi nullam Ordinato imponunt obligationem recitationis Officii Divini; immo censent tamdiu interdictum exercitium Ordinis suscepti, quamdiu Ordinatus in ætate impuberi attingat alteram ætatem a sacris Canonibus promovendis ritè præstitutam.

Expensa huc usque in abstracto ad tramites Legum Canonicarum, quibus Ecclesia Occidentalis informatur, facilem viam sternunt resolutioni non solum tertii Dubii, in quo quæritur: *An Diaconis Ritus Cophticæ sint primæ, & ulteriores Nuptiæ*; sed etiam quarti, in quo quæritur: *An Diaconi teneantur Divinum Officium recitare*.

Et sanè si Missionarii, qui Dubia proponunt, ultro consentiunt, apud Cophtos Ecclesiasticam Hierarchiam perseverare in suis Ordinibus, & gradibus aptè dispositam; si sacræ illæ Ordinationes nullo laborant

borant substantiali defectu ex parte materiæ, vel formæ; si demùm sublato illo, qui olim aderat, dissidentium opinionum conflictu, nemo est, qui hodie validam non fateatur Ordinationem a Ministro etiam Schismatico factam: Necessariò sequitur, ut quemadmodum in Ecclesiis Occidentalibus *validè* conferuntur Ordines Sacri etiam Infantibus; ita Cophtis sacer Diaconatus Ordo in infanti ætate *validè* conferatur.

Immo si in Ecclesia Occidentali, ut præmissum est, eximuntur ab obligatione recitationis Divini Officii non solum Pueri, sed etiam Impuberes assumpti ad Ordinem sacrum, nisi confirmata jam ætate suam Ordinationem expressè, vel tacitè ratam habeant; Ex paritate rationis idem ferendum est in hac quoque parte iudicium de Diaconis Ritu Cophto in tenera ætate ordinatis, recurrente in uno, & in altero casu defectu liberi assensus singulis ad Electionem, & Professionem status necessari.

In Concilio Toletano II. relato

in Can. de iis dist. 28. ubi sermo instituitur de iis, quos voluntas Parentum a primis Infantiae Annis Clericatus Officio mancipavit, hæc disciplinæ regula opportunè præscribitur: Ubi octavum decimum ætatis suæ compleverint Annum, coram Cleri Plebisque conspectu voluntas eorum de expetendo Conjugio ab Episcopo perscrutetur, quibus si gratia Castitatis Deo inspirante placuerit, Subdiaconatus Ministerium, habita probatione Professionis suæ, a vigesimo Anno suscipiant &c. Quibus autem voluntas, propriæ interrogationis tempore, desiderium nubendi persuaserit, concessam ab Apostolo licentiam auferre non possumus. Canonice hujus sanctionis Littera apertè edocet, Infantes a Parentibus Ecclesiasticis Ministeriis dedicatos, exacto decimo octavo Anno ab Episcopo interrogari oportere, an velint in sancto perseverare proposito, vel temporale iniire Conjugium. Ab hujusmodi rectè agendi semita non deflectat Præfatus Missionis; sed Diaconos in prima

ma ætate ordinatos apertè interroget per se ipsum, si commodè fieri possit; sin minus, per alium a se deputatum, & quæ illorum sit mens, & voluntas diligenter exploret. Hæc porro interrogatio, & inquisitio fiat, postquam Diaconi *DECIMUM SEXTUM* ætatis Annum exceſſerint: consonum quippe est, Diaconos eo tempore deliberare, quo juxta Tridentini Decreta in quacumque Religione tam Virorum, quàm Mulierum solemnia Castitatis, Paupertatis, & Obedientiæ vota per Regularem Professionem emittuntur. Si completo decimo sexto Anno Interroganti responderint, nolle diutius in Diaconali Officio persistere; liceat illis primum, eoque legitimè soluto, alterum quoque inire Matrimonium. Certiores prætere a fiant, nulla Ecclesiastica lege, vel præcepto ad recitandum Officium Divinum, vel preces a Clero Cophto usitatas compelli.

Nec turpe videri debet, aut indecorum, Diaconis a quavis Eccle-

fiastica Lege solutis aditum ad iteratas Nuptias aperiri. Pro libertate secundi Matrimonii Sacrae clamant Literae, & Doctoris Gentium saluberrima consilia. Ad Fœminas sermonem instituens Apostolus in *Epistola ad Romanos cap. 7.* Si autem, inquit, mortuus fuerit Vir ejus, liberata est a lege Viri, ut non sit adultera, si fuerit cum alio. Viro: Et in *2. ad Corinth. cap. 7.*: Dico autem non Nuptis, & Viduis: Bonum est illis, si sic permaneant, sicut & Ego: Quod si non se continent, nubant: melius est enim nubere, quam uri. Demum ad Timotheum *cap. 5.* Florantis ævi Viduas denuo ad Matrimonium, & ad sobolem procreandam hortatur, ne forte in contemptum Castitatis sordibus incontinentiæ coinquantur. Qua freti authoritate Orientalis Ecclesiæ Patres graviter erroris arguunt, & tamquam hæreticos damnant, qui putant, post primæ Uxoris obitum nefas esse ad secunda vota transire, ut videre est apud Petrum Arcudium *de Concordia*
Ec

31 89

*Eccles. Occident. & Orient. lib. 7.
cap. 27.*

E contra si Diaconi Ritus Cophti, completo decimo sexto anno, interroganti, & illorum voluntatem Inquirenti serio, ac deliberate responderint, velle se in adepto Ordine perseverare, & ecclesiasticis vacare muneribus; eo casu sub districti severitate judicii SECUNDÆ NUPTIÆ illis apertè interdiciantur, clamante Apostolo ad Timotheum *cap. 3. Diaconi sint unius Uxoris Viri*. Insuper, cum Personas Deo consecratas maxime puritas, sanctitasque deceat, provide *Canones Apostolici 17. & 18.*, quos præcipua veneratione, & cultu Ecclesia prosequitur, prohibent Episcopis, Presbyteris, & Diaconis nedum *bigamiam propriam*, quæ profuit ex secundo Matrimonio, sed etiam *similitudinariam* ortam ex primo Matrimonio cum Vidua, vel Corrupta contracto. Disposita per Canones Apostolicos innovata fuerunt *in Canone 3. Concilii Trullani*, cujus authoritas licet in Ecclesia Occi-

dentali recepta non sit ; illam tamen Orientalis Ecclesia suscipit , & veneratur . Alexius Aristenius (magni nominis apud Orientales Auctor , quemadmodum Balsamon , & Zonaras inferiori loco citandi) præfati Canonis Trullani Glossator , ita scribit : *Illum , qui binis implicatus est Nuptiis post Baptismum , aut Pellitem retinet , aut Viduam , aut ab alio dimissam , aut Meretricem , aut Servam , aut Scenicam ducit , non posse Episcopum , aut Presbyterum , aut Diaconum , aut Hypodiaconum fieri , juxta decimum septimum , & decimum octavum Apostolorum Canones , decernunt .*

P. Bernat apud Bollandistas loco citato propius ad rem accedens testatur , Diaconos Cophitos vinculo secundi Matrimonii alligatos *adepto gradu excidere* , & ab Ordinis antea collati ministerio suspendi . Nec sane deest huic Disciplinæ satis firmum rationis præsidium . Cum enim Diaconi opportuno tempore interrogati , libero & deliberato acta vo-
lun-

luntatis ratam Ordinationem habuerint, & novum quoddam vitæ genus ratificando elegerint, ac professi fuerint; deliberato pariter voluntatis actu, censendi sunt, se subjecisse Legibus Ordini ratificato, & vitæ instituto necessario connexis, ac Legi præsertim prohibenti secunda Conubia, & Bigamiam, adeo ut nefas sit a proposito resilire.

Toti hætenus fuimus in examine secundarum Nuptiarum: Nunc verò aliqua *de primis* attingenda sunt, ut singulis propositi dubii partibus satisfiat.

Quamvis antiquissimo tempore, ad augendam Clericalis Militiæ Sanctitatem, utraque Ecclesia Occidentalis, & Orientalis æquè præscripserit, nedum Presbyteros, sed alios etiam in Sacris Ordinibus constitutos in perpetuo Cælibatu versari debere, & hanc custodiendæ Castitatis obligationem numquam remiserit aliarum Mater, & Magistra Romana Ecclesia: Secus tamen contigit tractu temporis in Ecclesia Orienta-

li; ut apertè evincitur ex *Can. aliter distinct.* 31., *cap. quæsitum de pœnit. & remiss.*, & *cap. cum olim de Cleric. conjugat.* Quibus sanctionibus consonæ sunt Literæ Apostolicæ felic. record. Gregorii XIII. Prædecessoris Nostri datæ ad Patriarcham Maronitarum, legendæ apud Thomam à Jesu in supra memorato opere pag. 490. ibi: *Cum Stephanus Papa tradat, Orientalium veterem esse traditionem, ut eorum Sacerdotes Matrimonio copulati sint, cumque id illis nunquam interdixerit Ecclesia, nec videtur interdicens Maronitis: Lex enim Calibatus semper gravis visu est Græcis, propterea Conjugium permissum est illis &c. Permittendum id itaque videtur Maronitis, dummodo ad Matrimonium non compellantur, qui cælibes esse vellent, sed ad id potius piis hortationibus inducantur.*

Junguntur Matrimonio Græci in Minoribus Ordinibus constituti, & Uxore retenta, ad majores Ordines, & ad Sacerdotii gradum
rite

rite promoventur. Ubi tamen contingerit, eos in Statu Cælibi Sacris Ordinibus insigniri, a quacumque spe contrahendi Matrimonii deji-
ciuntur, ut fuse edocet *Gloss. in Canon. Diaconi distinct.* 28.

Quin obftet declaratio, & protestatio de expetendo Conjugio in ipsa susceptione Ordinis Sacri emissa a Diaconis; qua concurrente, compatibles videntur Nuptiæ cum simultaneo Diaconatus Ministerio, ad præscriptum *Canonis* 10. Concilii Ancyranî, relati in *Canon. Diaconi dist.* 28.: Quicumque Diaconi constituti, in ipsa ordinatione protestati sunt, & dixerunt, oportere se Uxores ducere, cum non possint sic manere, ii si Uxorem postea duxerint, in ministerio maneant, eo quod hoc sit illis ab Episcopo concessum; si qui autem, hoc silentio præterito, & in Ordinatione, ut ita manerent, suscepti sunt, postea autem ad Matrimonium venerunt, ii a Diaconatu cessent: Siquidem Balsamon, qui Canonem illum accurate expendit, expressè rejicit in illo dis-

polita, inquiens: *Hunc Canonem ne sequaris*; & innixus solidiori doctrinæ Sexti Canonis Synodi Trullanæ, inefficacem esse concludit assensum dictæ protestationi quoquo modo præstitum ab Episcopo Ordinante: *Sextus enim Canon* (sunt illius verba) *Synodi in Trullo deponendos decernit Presbyteros, & Diaconos, qui post Ordinationem matrimonium contraxerint. Quod sit autem contra Canones, nec ex permissione Episcopali, nec ex eo tantum, quod tacuerint, concedetur, ut quod consistere nequit.*

Eadem est quoque Sententia Zonaræ de Canone supra relato Concilii Ancyрани; immo ad removen-
dam antinomiam duorum Canonum, nempe Ancyрани & Trullani, qui inter se colliduntur, sextæ Synodi Decreta sequenda proponit: *Cum igitur sibi invicem hi Canones manifeste adversentur, sextæ Synodi Canon, qui & posterior fuit, & magis cum Apostolico Canone consentit, servari debet*: Nec diversimode etiam sentit Aristenius, qui in hoc auctoritatum
con-

conflictu adhæret partibus Concilii Trullani; Ait enim: *Sed huic Canonni opponitur sextus sextæ Synodi Canon, non omnino ei, qui Cælebs ad Hypodiaconi, aut Diaconi, aut Presbyteri gradum venit, concedens Matrimonio sibi Fæminam conjungere, sed eum, qui hoc ausus fuerit, deponi jubens. Et vim retinet ille Canon; sed hic in desuetudinem abiit.*

Diù multumque agitata est inter Theologos controversia illa, plena jurgii, ac dissidii: An solum illicitum, vel potiùs illicitum, & invalidum reputari deberet Matrimonium initum in Ecclesia *Orientali* post collationem Sacrorum Ordinum, quemadmodum nullum, & irritum reputatur in Ecclesia *Occidentali*. Placuit sane pluribus, *validum, sed illicitum* censerì debere hujusmodi matrimonium, tum quia Canonice Sanctiones, & Decreta Ecclesiæ Occidentalis illud irritantia, protendi non possunt indole sua ad Ecclesiam Orientalem; Tum quia Canones Synodi Trullanæ, quorum semper a Græcis

cis commendata fuit authoritas, nulli libi expresse annullant, & irritant matrimonium post Sacros Ordines contractum. Strenuè contra pugnarunt alii pro omnimoda invaliditate; Et saniori certè consilio, utpote tuentes sententiam majoribus suffragiis suffultam, & menti Congregationum Urbis consentaneam. Nullitatem Matrimonii satis erui posse judicaverunt ex ipso *Canone* 3. Concilii Trulani his verbis: *Et nefario videlicet dissoluto Conjugio.*

Favet etiam eidem Sententiæ authoritas Imperatoris Justiniani, qui in Codice a Gothofredo illustrato *lib. primo de Episc. & Cleric. Novell. 45.* hujusmodi Nuptias nefarias, & incestuosas appellat, & soboli inde procreatæ notam illegitimitatis, & turpem paternæ incontinentiæ maculam inurit. Et licet in Juribus Ecclesiasticis Potestati Laicæ sola relicta sit gloria obsequendi, non authoritas imperandi; In subjecto tamen casu loquitur Imperator relative ad Sacros Canones, ibi: *quæ & Sacris visa*

visa sunt Canonibus.

Omnia itaque in unum perstringentes, si ex hucusque dictis Græcis ad Ordines sacros jam promotis expressè vetitæ sunt non solum *secundæ*, sed *primæ* etiam Nuptiæ; Pari sanè jure in proposito themate prohibenda est Diaconis Ordinatis in tenera ætate celebratio *quarumcumque Nuptiarum*, postquam ipsi in ætate jam confirmata, serio deliberatoque animo consensere in Ordinationem jamdiù susceptam, illamque publicâ declaratione ratificaverunt; proindeque Patribus Missionariis omnis adimitur potestas super hoc dispensandi.

Nec opitulari quoquo modo potest Cophtis salutare propositum ejurandi Schismaticorum errores, seque devovendi ex animo unioni Catholicæ Romanæ Ecclesiæ. Si enim divina tantum adspirante aura, nulloque humano impellente consilio, in piæ Matris gremium se receperint, & ad Nos confugerint; facîle etiam intelligent, ejusdem Catholicæ Ec-

cle-

clesiæ disciplinæ, & observantiæ eos conformari oportere; Ideoque sub-
jici legi Cælibatus, quam Promoti
ad Ordines sacros, sive Latini sint,
sive Græci, in Romana Ecclesia san-
ctè, & inviolatè custodiunt.

Imminet etiam Diaconis ratam
habentibus suam Ordinationem onus
diutinè recitandi Officium Divinum;
de quo instituitur quæstio *in quarto*
Dubio.

In Ecclesia Occidentis imposi-
ta est Presbyteris, Diaconis, & Sub-
diaconis dicta obligatio, quamvis
nullum Ecclesiasticum Beneficium
fuerint assequuti. Cohæret enim Or-
dini Sacro diurnum pensum Hora-
rum Canonicarum; Illudque veteri
traditione acceptum, & immemora-
bili consuetudine in more positum
fuisse, docet communior Theologo-
rum opinio. Quantum assequi po-
tuimus conjectura, & testimonio Mo-
nachorum Ritus Cophti in Urbe de-
gentium, quos ea de re percontari
non prætermisimus, Diaconi, Sub-
diaconi, & Presbyteri Ecclesiæ Ori-
entis

entis nulla lege expressa, Canone, aut Concilii Decreto adiguntur ad recitationem Officii Divini; Quia verò positi in hujusmodi ministerii gradibus tenentur Omnipotenti Deo orationes, & sacrificium laudis offerre, etiam apud Orientales laudabilis invaluit consuetudo recitandi Divinum Officium.

Memoriæ proditum est, Patriarcham Maronitarum plura proposuisse Dubia Prædecessori nostro Gregorio XIII., ut supremo illius, & Apostolicæ Sedis judicio definirentur. Legitur §. 6. hoc potissimum: *Creamus, inquit Patriarcha, Pueros quinque, vel sex Annorum Subdiaconos sine obligatione legendi Horas Canonicas*: En Apostolica Definitio relata in sæpe memorato Opere P. Thomæ a Jesu: *Tenentur etiam omnes Ordinati ad Horas Canonicas, saltem illi Nationi consuetas, & a Viris doctis recognitas, non solum Beneficiati, sed etiam, qui sunt in Sacris sine Beneficio*. Qua de re, si Disciplina Ecclesiæ Orientalis subjicit obli-

obligationi, & præcepto recitandi Officium Divinum *more Nationis* generatim omnes in Sacro Ordine constitutos; Eadem sanè obligatio, idemque præceptum persolvendi Horas Canonicas *more suæ Nationis* afficiet Diaconos Cophtos, qui per solemnem ratificationem tempore habili emissam denuo assensum præstiterè Ordini Sacro in infantili ætate suscepto.

Satis hæc videri possunt pro examine tertii, & quarti dubii, semper tamen præ oculis habita firmiterque retenta hypothese, quod quaestio usque modo instituta referenda sit ad Diaconos ordinatos in prima ætate Ritu Cophto inter Schismaticos, qui post reditum ad Orthodoxam Ecclesiam, & post ratihabitionem Ordinis factam apud Catholicos in statu cælibi, vindicent sibi postea legitimi Jura Conjugii.

At suspicari Nobis non temerè licet, crebrius in praxi alium dari casum a præmissa hypothese longè diversum. Sæpissimè etenim contingit,

git, a Diaconis apud Schismaticos in ætate infantili ordinatis, ubi ætas adolevit, ratam haberi apud eosdem Schismaticos Ordinationem, si non expressè, saltem tacitè, v. g. ministrando in Ordine suscepto, & ab ipsis subindè contrahi Matrimonium. Demum ab erroribus, in quibus versantur, quærunt in sinu Catholicæ Ecclesiæ salutare perfugium, sub spe tamen obtinendæ Dispensationis super Matrimonio jam inito, ut in statu conjugali legitimè perseverent.

Casus iste quò frequentior est, eò etiam explicatu difficilior. Etenim si ad tramites jam expensarum rationum ipso jure irrita sunt Matrimonia post Ordinem Sacrum contracta; necessariò sequitur, Diaconos in reditu a schismate ad unitatem Ecclesiæ non posse pedes tenere in diversis, unum in Divinis, alterum in carnalibus, sed illico separari debere a quovis Uxoris consortio. Quis erit tamen, qui non agnoscat, ac fateatur, hanc separationem gravem obicem obtrudere properantibus in
viam

viam salutis, ac plurimum obstare, ne inita de Conversione consilia ad exitum perducantur?

E. contra verò si facilè cum Diaconis dispensetur in Matrimonio post Sacrum Ordinem contracto (quod tamen omnino novum, ac inusitatum non esset, ut perperam nonnulli arbitrantur) ineluctabiles sese objiciunt difficultates in dicta Dispensatione exequutioni demandanda. Siquidem cum apud Fideles etiam Ecclesiæ Orientalis nulla sint, & irrita Matrimonia post Ordines Sacros celebrata; dispensatio grave illis scandalum ingereret, & acerbè quererentur, maximum infligi vulnus Ecclesiasticæ disciplinæ. Insuper cum res sit de Matrimonio in radice nullo; Dispensatio suffragari non posset, nisi renovato, ac denuo in faciem Ecclesiæ ritè præstito a Conjugibus consensu. Hanc verò renovationem consensus novam omnino putarent Cophti, vel fortasse refugerent, tamquam plenam alex, probè intelligentes, unum, & alterum Conjugem posse

posse pro libito abstinere a præstando assensu , immo potiri facultate se se in libertatem vindicandi .

Cæterum , ut mox innuimus , indubiis Ecclesiasticæ Historiæ monumentis edocemur , alias dispensatum fuisse , ut Orientales ad Unitatem redeuntes perseverarent in fœdere Matrimonii post Sacros Ordines contracti . Exemplum hujusmodi Dispensationis exhibent Apostolicæ Literæ fel. rec. Innocentii IV. Prædecessoris Nostri Anno 1244. datæ ad Magistrum , & Priorem Fratrum Prædicatorum Terræ Sanctæ , quibus idem Pontifex inter alia indulget , ut per Fratres dicti Ordinis, *qui deputantur ad prædicandum Jacobitis , Neofritis, Giorgianis, Græcis , Armenis , Maronitis , Mossolinis , aliisque Nationibus in Partibus Orientalibus constitutis &c. dispensari valeat , ut illi ex Nationibus numeratis , qui post susceptionem Sacrorum Ordinum , vel in gradibus , & casibus a Divina minimè Lege prohibitis , Matrimonia contraxerunt , reman-*

maneant in eisdem : Extat dictarum
literarum Exemplar authenticum
Romæ in Archivo Ordinis , exscri-
ptum ad fidem Autographi asservati
in Cœnobio Viterbiensi , ut videre
est in novissimo Bullario Dominica-
no edito , & illustrato ab Antonino
Brémont dicti Ordinis Alumno *tom.*
1. pag. 136.

Sed hæc exempla tanti non
sunt, ut Nos statim ea sequi velimus.
In hoc gravi negotio , in quo multa
desunt , quæ scitu digna sunt , hære-
mus adhuc ; & præcipuum Pontificiæ
solicitudinis munus esse intelligen-
mus , nihil intentatum relinquere ,
quod ad singulas circumstantias enu-
cleatè assequendas pertinere possit ,

Partes erunt igitur Vicarii Ge-
neralis , ac Præfecti Missionis, cæte-
rorumque Missionariorum , ad quos
præsentem Instructionem deferri vo-
lumus, Articularis infra subiectis con-
gruum , ac dilucidum exhibere res-
ponsum, Nosque certiores quam pri-
mum efficere , ut tandem firmo , ut
ajunt , pede deliberare possimus .

I. An

I. An spes ulla affulgeat proximi
reditus alicujus Episcopi ad sinceram
cum Catholica Ecclesia Unitatem.

II. An rebus in eo, in quo hodie
sunt, statu manentibus, expediat,
tribui uni, vel pluribus Presbyteris
facultatem extraordinariam admini-
strandi Sacramentum Confirmatio-
nis: Cui, vel quibus dicta facultas
tutò delegari possit, ut Sacro Chris-
mate præcipue liniantur Filii orti a
Parentibus Catholicis post hæresim
ejuratam, & abluti Sacro Baptisma-
te, saltem a Sacerdote Latino?

III. An in casu concessionis hu-
jusmodi facultatis, expediat monere
Sacerdotes, ne ea utantur admini-
strando Confirmationem Infantibus
immediate post Baptismum (nisi in
casu necessitatis), sed in ea tantum
ætate, qua Confirmandus virtutem
Sacramenti valeat mente percipere?

IV. An Diaconi Ritus Cophti
atingant hodie eximium illum nu-
merum, qui a Scriptoribus præfer-
tur? An Diaconi ordinati in ætate
puerili, ministrent adulti in Orden
su-

suscepto , & in statu cælibi , itaut inferri possit , eos ante Nuptias ratam Ordinationem habere ; Cum compertum sit , teste P. Benart , eos a *Puero functionibus Ecclesiasticis assuescere* , & in magno numero ordinari , ne aliquando desint , qui *Ecclesiæ Ministeriis operam navent* .

V. An & quomodo tolli possit , & radicitus extirpari abusus conferendi Ordines ante legitimum tempus , & induci quoad ætatem Ordinandorum observantia Decretorum Concilii Tridentini , quam in casu simili , ad Catholicæ Fidei præsidium , & disciplinæ Ecclesiasticæ augmentum , Gregoriûs XIII. plurimum commendavit Patriarchæ Maronitarum in illis verbis : *Inducendi sunt Maronitæ , ut Concilii Tridentini Decreta observent sess. 23. cap. 12.*

VI. An plus commodi , & utilitatis , vel potius scandali , & detrimenti allatura sit rei Catholicæ Dispensatio super Matrimonio inito post Ordines Sacros , libratâ in utramque partem omnium rationum ,
& cir-

& circumstantiarum monumentis .

Enixe demum expetimus ea omnia , quæ Evangelici Præcones ad Animarum salutem , ad Catholicæ Fidei propagationem , & spirituale solatium Nationis illius , quam intima complectimur charitate , opportuna esse cognoverint . Interim Deum , a quo sancta desideria , recta consilia , & iusta sunt opera , enixe rogantes , ut Ovibus , ac Pastoribus suorum charismatum dona multiplicet , eisdem optati eventus auspicem , Apostolicam Benedictionem ex animo impertimur .

Datum Romæ apud S. Mariam
Majorem die iv. Maji MDCCXLV.
Pontificatus Nostri Anno Quinto .



INSTRUCTIO

PASTORALIS

SECUNDA.

dot
XX
vii
B.

BENEDICTUS PP. XIV.

Dilecti Filii, salutem, & Apostolicam Benedictionem.



N N o vertente re-
 parata salutis mil-
 lefimo septingen-
 tesimo quadragefi-
 mo quinto, Ponti-
 ficatus autem No-
 stri quinto, tum ut
 partes Apostolici Nostri ministerii
 impleremus, tum etiam, ut præcla-
 ram significationem paterni animi
 nostri, ac dilectionis, qua semper
 complexi sumus, complectimur, sem-
 perque complectemur inclytam Na-
 tio-

tionem Cophtam, præberemus, auditis gravium, ac prudentum hominum sententiis, nostris quoque laboribus, ac privato studio adjunctis, Pastoralem Instructionem super quibusdam, de quibus ambigebatur, ad eorum ritus, & mores spectantibus edidimus.

Ea verò in Instructione, quæ typis impressa fuit, nostroque Bullario inserta, actum est de Ritu Cophtorum, quo Sacramentum Confirmationis a simplici Sacerdote statim post Baptismum confertur; agitur etiam de more, ac consuetudine eorumdem conferendi Ordinem Diaconatus pueris adhuc in infantili ætate existentibus. Quibus de rebus ea, quæ consentanea erant, & opportuna, constituta sunt: Nonnulla autem indefinita remanserunt; quia, priusquam de illis responsum a Nobis daretur, necessarium visum fuit, plura, quæ haud satis nota, & perspecta erant, exquirere, ut in eadem Instructione videre licet. Interea vero omnes curas, ac diligentias ad-

hibere non prætermisimus, ut eorum, quæ adhuc deerant, cognitionem assequeremur. Collectis proinde omnibus, quoad fieri potuit, quæ necessaria videbantur, *die 10. Martii anni currentis 1750.* nonnullos Sanctæ Romanæ Ecclesiæ Cardinales, alios in Sacræ Theologiæ facultate Magistros, alios autem in jure Canonico peritos, coram Nobis, rimatis antea per Nos omnibus, & perpensis, congregari jussimus. In hac autem Congregatione, dubia, quæ proponebantur, in duas Classes dispertita fuerunt: una eorum fuit, quibus neque adhuc ullum responsum præberi poterat; altera verò eorum, quibus & nunc responderi poterat, & quæ opportuna videbantur, discerni.

Inter dubia, quæ indefinita remanserunt in nostra Pastoralis Instructione unum illud fuit: *An spes ulla affulgeat proximi reditus alicujus Episcopi ad sinceram cum Catholica Ecclesia unitatem.* Alterum verò: *An & quomodo tolli possit, & radicatus*

tus extirpari abusus conferendi Ordines ante legitimum tempus, & induci quoad ætatem Ordinandorum observantia decretorum Concilii Tridentini, quam in casu simili ad Catholicæ Fidei præsidium, & disciplinæ Ecclesiasticæ augmentum Gregorius XIII. plurimum commendavit Patriarchæ Maronitarum. Hæc autem duo dubia in prædicta ultima Congregatione reposita fuerunt in eorum Classe, quibus neque adhuc responderi poterat, cum ex iis, quæ novissime Nobis relata fuerunt, nulla proxima spes affulgeat, ut aliquis ex ejusdem Nationis Episcopis, ejuratis schismatis, ac hæresum erroribus, ad Catholicæ Ecclesiæ sinum revertatur.

Similiter inter dubia, quæ indefinita relicta fuerunt in superius laudata Instructione, reperitur illud: An rebus in eo, in quo hodie sunt, statu manentibus, expediat tribui uni, vel plaribus Presbyteris facultatem extraordinariam administrandi Sacramentum Confirmationis; cui, vel

quibus dicta facultas tunc delegari possit, ut Sacro Chrismate præcipue liniantur filii orti a Parentibus Catholicis post hæresim ejuratam, & abluti Sacro Baptismate saltem a Sacerdote Latino. Et illud quoque: An in casu concessionis hujusmodi facultatis expediat monere Sacerdotes, ne eam utantur administrando Confirmationem infantibus immediate post Baptismum (nisi in casu necessitatis) sed in ea tantum ætate, qua Confirmandus virtutem Sacramenti valeat mente percipere. Hæc autem postrema duo dubia in ultima Congregatione posita fuerunt in Classe eorum, quibus responsum præberi nunc potest.

Itaque eorum examine assumpto, auditisque Congregatorum sententiis, Decretum fieri placuit in hunc modum: Sanctissimus consentaneum judicavit delegare Præsæcto Missionum Ægypti facultatem extraordinariam conferendi, Chrismate tamen ab Episcopo benedicto, Sacramentum Confirmationis illis, qui a Sacerdotibus Latinis Baptismum acceperunt.

ceperunt: *Caveat autem Præfæctus hujusmodi Sacramentum illis conferre, qui septimum ætatis annum nondum attigerint, nisi forte periculum mortis immineret, ne, ingravescente morbo, sine hoc Sacramento decedant. Denique Sanctitas Sua facultatem elargiri solum intelligit, donec necessitas id postulaverit, videlicet, donec aliquis Catholicus Episcopus in Ægypto babeatur.*

Hujusmodi Decretum etiam in præsentia a Nobis confirmatur: cum in omnibus, ac per omnia conveniens, ac consentaneum sit tum iis, quæ exposita fuerunt in præcedenti nostra Instructione *Anni 1745. §. quod attinet ad primum*; tum etiam iis, quæ fusè a Nobis tractata sunt in nostro Opere *de Synodo Diæcesana* impresso *Anno 1748. lib. 7. ubi cap. 7.* actum est de consuetudine Presbyterorum Græcorum impertiendi Sacramentum Confirmationis statim post Baptismum, & de Episcopo, qui est Minister ordinarius hujus Sacramenti: *¶ cap. 8. de necessitate, quam*

habet Sacerdos Latinus si a Summo Pontifice constituatur Minister extraordinem Sacramenti Confirmationis, utendi Chrismate ab Episcopo benedicto, & *cap. 9.* resumpta integra materia exponitur, quousque se proferat tolerantia Apostolicæ Sedis, & in quibus Græcorum Regionibus locum habere valeat vetus consuetudo, qua eorum Sacerdotes Fidelibus statim, ubi Sacro Lavacro abluti sunt, Sacramentum Confirmationis conferunt: adeo ut non aliud hic addere opus sit, quàm Præfecto Missionum Ægypti eandem a Nobis concedi facultatem, quæ data est Guardiano Sancti Sepulchri, qui ex beneficentia, & gratia Sedis Apostolicæ durante ejus Officio, ubi Episcopi Latini in suis Diœcesibus residentes non adsunt, in Terræ Sanctæ Locis Sacramentum confert Confirmationis; facultatem videlicet conferendi Sacramentum hujusmodi, Oleo, & Chrismate etiam antiquis, si nova haberi non possint, per Catholicum Antistitem gratiam, & communionem

nem Sedis Apostolicæ habentem benedictis, quemadmodum quisque legere poterit in nostra Constitutione, quæ decima est in Tomo primo Nostri Bullarii.

Etenim etsi juxta ea, quæ in Pontificali Romano præscripta sunt, singulis Annis feria quinta in Cœna Domini Sacrum Chrisma renovari debeat, neque liceat uti Chrismate Anno præcedenti consecrato; id tamen locum non habet, si aut Chrisma recipi nequeat, nisi ab Episcopo, qui a Communione Apostolicæ Sedis separatus sit, aut etiam si aliquis Episcopus adsit in Communione Ecclesiæ Catholicæ degens, ea tamen sit locorum distantia, vel aliud intercedat impedimentum, ut ab eo novum Chrisma accipi nequeat; tunc quippe licere censetur uti vetere Chrismate ab Episcopo Catholico annis præcedentibus benedicto, sicut a Nobis latè demonstratum est in Nostra Notificatione 14. *Tom. 4. Bononien. editionis*, cum in ea Urbe degentes Archiepiscopi munere funge-

remur. Quod autem pertinet ad ætatem, qua Sacramentum Confirmationis dari debet, aut conferri permittitur etiam iis, qui adhuc per ætatem capaces non sunt probè, ac benè percipiendi vim, ac valorem Sacramenti, id, quod responsum est, apprimè concordat cum iis, quæ a Nobis collecta, & fusè exposita sunt in laudato Nostro Tractatu *de Synodo Diocesana lib. 7. cap. 10.*

Prosequendo examen dubiorum, quæ in Classe collocata sunt eorum, quibus nunc responderi poterat, illud ordine succedit: *An si Diaconi ordinati in ætate puerili ministrent adulti in Ordine suscepto, & in statu calib, inferri possit, eos ante nuptias ratam Ordinationem habere, cum compertum sit teste P. Benart, eos a puero functionibus Ecclesiasticis assuescere, & in magno numero ordinari, ne aliquando desint, qui Ecclesiæ ministeriis operam navent.* Cum igitur examen præscripti Dubii aggredi placuerit, post latum a quolibet ex Congregatis suffragium, pronunciatum

tum est a Nobis Decretum in hæc verba : *Diaconi in ætate puerili ordinati , licet ante decimum sextum ætatis annum ministraverint in Ordine suscepto , & in statu cælibi , tamen non censentur ante nuptias Ordinationem ratam habuisse , eo quod nibili faciendi sint illi actus , quos in ætate puerili , & ante decimum sextum ætatis annum exercuerint .* Quod Decretum nunc pariter a Nobis confirmatur .

Ut verò ea , quæ decreta sunt , planius intelligantur , opus est aliquantum digredi ; hac enim ratione procedendo via munietur , ut ad propositum finem perveniamus .

Nemo est , qui ignoret , duobus modis religiosam Professionem fieri , vel , ut melius dicamus , duplicem esse Professionem religiosam , unam expressam , alteram verò tacitam . Expressa fit , cum debitis servatis solemnitatibus , tria vota Castitatis , Paupertatis , & Obedientiæ conceptis verbis emittuntur , quæ in Constitutionibus Ordinis , in quo quis se

velle vivere profitetur, præscripta sunt; Tacita autem in eo posita est, cum quis ea exercet, & operatur, ex quibus arguitur, ad vivendum in aliqua religione se obligare voluisse, etsi solemniter, & expressè eam professus non fuerit.

Tacita Professio a sacro Tridentino Concilio juxta communio-rem sententiam sublata non est, ut latè testantur Navarrus, Azorius, Sanchez, Fagnanus (a). Sed cum in eodem Concilio decretum fuerit, nullas ac irritas esse Professiones, quæ in quacumque Religione fiunt ante annum decimum sextum ætatis profitentis, & antequam integer annus probationis expletus fuerit, hinc rectè deducitur, etiamsi a Concilio tacita Professio sublata non sit, eam tamen locum non habere, si actus, ex quibus illa inducitur, peracti non fue-

(a) *Consil. 35. de Regular. num. 5. Instit. part. prima lib. 12. cap. 4. quæst. 6. De Matrim. lib. 9. disp. 37. num. 2. In cap. Perlatum de iis, quæ vi &c. num. 46.*

fuerint post annum decimum sextum ætatis profitentis, & postquam annus probationis completus est; ita ut a Concilio Tridentino magna ex parte temperata sit dispositio Epistolæ Decretalis: *Is, qui de Regularibus in sexto*, & Clementinæ secundæ sub eodem titulo *de Regularibus*.

Ad instar Conciliaris Dispositionis a Nobis constitutum est, ut Diaconi Cophti in infantili ætate ordinati, ubi ad annum decimum sextum ætatis suæ pervenerint, a Præfecto Missionum interrogentur, num velint, necnè, perseverare in Ordine suscepto, & obligationes omnes Ordini annexas implere, ut inde statui possit, quid in futurum in reliqua eorum vita ab ipsis servandum sit, sicut quisque videre potest in pluries laudata Instructione Nostra anni 1745. Itaque quemadmodum stabilita per Concilium ætate anni decimifexti ad Professionem Regularem emittendam, Tacita locum non habet, etiamsi ante prædictam ætatem actus illi expleantur,

ex quibus secundum Canonicas dispositiones tacita Professio inducitur; sed omnes illi nullo in numero, & pro nihilo habentur ad tacitam Professionem Regularem inducendam, nisi expleti fuerint post annum ætatis decimum sextum, & postquam anno probationis evoluta expressa Professio emissa non est: Ita constituto a Nobis anno decimosexto, quo, ut dictum est, Præfectus Missionum Diaconos in puerili ætate ordinatos interrogare debet, velint ne, an secus, perseverare in Ordine suscepto, & obligationibus Ordini conjunctis satisfacere, ex Ordinis exercitio ante annum decimum sextum eorum ætatis peracto nulla tacita ratihabitio argui debet: cum ad summum hujusmodi actus tacitam ratihabitionem importare possint, si gesti fuerint post annum decimum sextum, eo casu, quo Præfectus Missionum anno decimosexto eorum ætatis ipsos interrogare, quemadmodum ab illo fieri debere, sæpius monitum est, neglexerit.

Re-

Remanet ultimum ex iis, quæ Responso Nostro definiri posse diximus; illud autem est hujusmodi: *An plus commodi, & utilitatis, vel potius scandali, & detrimenti allatura sit rei Catholicæ dispensatio super Matrimonio inito post Ordines sacros, libratæ in utramque partem omnium rationum, & circumstantiarum momentis.* Præmissa in præcedenti Instructione Ecclesiæ Orientalis consuetudine retinendi cum Ordine sacro uxorem, quæ tamen ante Ordinis susceptionem accepta sit, atque indicatâ etiam controversiâ, an Matrimonium ab Orientalibus initum post Ordinem sacrum irritum sit, an potius dumtaxat illicitum, transitus factus est ad aliam quæstionem; an rectum, probè factum, ac utile videretur, an potius scandalo esse posset, aliquem dispensare, qui uxorem post Ordinem sacrum duxerit, ut eam retinere, ac simul sacro Ordine perfungi, & sacra munia exercere possit, quia hujusmodi dispensationes interdum a Sede Apostolica concessæ

factæ fuerunt. Cum autem, quæ ad
 quæstionem definiendam necessaria
 videbantur, non satis nota, ac per-
 spectæ essent, placuit rem differre, &
 interim exquirere, quæ opus erant,
 ut plenius de re tota instrueremur.
 Cum autem ad nostram cognitionem,
 quæ expectabamus, relata sunt, au-
 ditis Congregatorum suffragiis in ea
 fuimus sententia, ut nemini facultas
 dispensandi concederetur, sed Sedis
 Apostolicæ reservaretur, ut, cum
 casus contingerit, & dispensatio po-
 stuletur, maturè expendantur, quæ
 necesse est considerare, ut, vel con-
 cedatur, vel denegetur dispensatio,
 cum de re gravissima, ac magni mo-
 menti agatur. Decretum autem con-
 ditum est in hæc verba: *Recurrant ad
 Apostolicam Sedem in casibus parti-
 cularibus, in quibus, si ob graves
 causas Dispensatio super Matrimonio
 inito post Ordines sacros concedenda
 videbitur, tunc nullum verbum fiat
 de renovatione consensus.* Haud igno-
 tum est, quanta difficultas occurrat,
 quoties super Matrimonio ex impe-
 di-

dimento dirimenti nullo dispensatio conceditur, solitâ conditione, ut inter Conjuges consensus renovetur: cum accidere possit, & nonnunquam contigerit, ut mulier haud contenta viro, vel vir uxorem fastidians, ut se in libertatem vindicet, eorum alter, vel uterque novum consensum præbere renuat. In Decreto mox relato haud mens nostra fuit, renovationem consensus excludere, cum Matrimonium extra dubitationem nullum est; sed, cum gravis illa controversia, ut dictum est, adhuc vigeat, an Matrimonium in Ecclesia Orientali post Ordinem sacrum contractum, perinde nullum sit, ac in Ecclesia Occidentali, an potius sit solummodo illicitum; Et cum hujusmodi controversia (exceptis Italo-Græcis, quorum Matrimonia post Ordinem sacrum inita, statutum est, nulla, & irrita esse, ut in nostra Constitutione, quæ incipit: *Et si Pastoralis* §. 7. num. 28., quæ est quinquagesima septima in ordine Bullarii Nostri tom. 1.) quoad cæteros Orientales

tales Græcos nullo adhuc Decreto Apostolico definita fuerit, licet Tribunalia hujus almæ Urbis opinioni eorum adhæreant, qui hæc Matrimonia nulla existimant; nihilominus fatius visum est, ut adveniente casu concedendi dispensationem, conditio renovationis consensus non exprimat. Decretum autem, de quo agitur, nunc etiam a Nobis solemniter confirmatur.

Hæc autem sunt, quæ a Nobis constituta fuerunt, quæque pro recta Cophtorum disciplina, dirigendisque moribus opportunum esse duximus, ut huic nostræ secundæ Instructioni infererentur. Hinc autem inelyta illa natio, quæ etiam antiquis temporibus suæ unionis cum Apostolica Sede, quæ centrum est unitatis, illustria præbuit argumenta, satis intelligere poterit, quam eximio charitatis affectu eam in Domino prosequamur; eique interea veluti dilectionis Nostræ pignus Apostolicam Benedictionem impertimur.

Da-

Datum ex Arce Castri Gandulphi die XIX. Junii MDCCL. Pontificatus Nostri Anno Decimo.

LAUS DEO.



THE UNIVERSITY OF CHICAGO
LIBRARY
540 EAST 57TH STREET
CHICAGO, ILL. 60637

OLD 20A



100

